

李文忠公全集

奏稿

李太史公全集

卷八

李文忠公奏稿

卷之五十八目錄

潘曾瑋請專祠片

光緒十二年九月初四日

伍廷芳等仍請給獎片

光緒十二年九月初四日

哈孫克賴乏請給寶星片

光緒十二年九月初四日

奏調沈保靖片

光緒十二年九月二十六日

奏留宋慶片

光緒十二年九月二十六日

覆奏李成鼐等獎案片

光緒十二年九月二十六日

蠶池教堂完案摺

光緒十二年十一月初二日
附來函並往復照會

海防經費報銷摺

光緒十二年十一月初四日
附清單

營口礮臺工費片

光緒十二年十一月初四日

停引展限復額摺

光緒十二年十一月初四日

嚴信厚郭澍滋獎敘片

光緒十二年十一月初四日

豫岸加價免增摺

光緒十二年十一月初四日

機器局報銷摺

光緒十二年十一月二十日

藩庫勻撥鎗價片

光緒十二年十一月二十日

海防用款清單摺

光緒十二年十二月初三日

船塢酌定工價片

光緒十二年十二月初三日

旅順電綫片

光緒十二年十二月初三日

蠶池教堂獎敘片

光緒十二年十二月初三日

淮軍軍需報銷摺

光緒十二年十二月十六日

軍需交涉洋務片

光緒十二年十二月十六日

淮軍水師報銷片

光緒十二年十二月十六日

冬賑銀米數目片

光緒十二年十二月十六日

李文忠公奏稿卷五十八

全集一之五十八

桐城吳汝綸編錄

潘曾瑋請專祠片

光緒十二年九月初四日

再據江蘇紳士前浙江甯紹台道顧文彬等聯名呈稱已故吳縣紳士布政使銜記名道潘曾瑋器識宏通勇於任事咸豐四年由刑部郎中丁憂回籍奉

旨幫辦團練時蘇垣有潮勇千百人劫殺爲亂遂率所部練勇剿捕解散地方賴以安謐八年會克瓜洲鎮江嗣以金陵大營師潰難民猝至奉派督辦撫恤全活二萬餘人服闋仍補郎中十年蘇常淪陷復奉

旨馳抵上海幫辦團練時粵逆麇集浦東滬城岌岌不可終日會西人願助順而論者慮洋情叵測該故紳力排眾議於上海創設

會防局以扼賊氛同治元年航海入都謁王大臣劉陳勦賊之策據情轉奏奉有撫臣會同紳士商辦藉挽大局之

諭又與眾紳馳書故大學士曾國藩乞援雇備輪舟迎臣統兵東下隨同轉戰松滬會克蘇垣並籌辦餉捐至百數十萬兩吳中久困重賦該故紳與馮桂芬創議請減條具章程經臣核定入告得邀

俞允民困始蘇當蘇城甫克時洋將戈登與提督程學啟構釁招偽納王郅雲官養子郅勝鑣與同居經臣派往慷慨撫諭戈登感泣知悔旋委辦蘇省善後事宜及中外交涉要件無不任勞任怨井井有條金陵克復後各營欠餉甚巨復合力籌解數十萬兩俾得資遣營勇帖然歸里計其生平事蹟實屬有裨軍國而桑梓尤蒙惠不淺以積勞致病在籍養病未竟其用於上年十二月間

病故該紳顧文彬等合詞呈請捐建專祠以資報享並准兩江督臣曾國荃緘請會奏前來臣查該故紳潘曾瑋於平吳之役始終其事功績甚多其最著者則在上海創設會防局維時賊氛環逼非中外合防滬城將不可保臣雖統兵東下而無立足之地不能節節進攻數百萬餉需亦無自而出至蘇州甫克洋將戈登與程學啟構釁揚言助賊若非該故紳調和撫諭幾挾其軍以爲變是皆關乎兵事得失地方安危之大者若議減賦以與民更始尤爲公家經久之規萬姓永遠之利查自軍興以後有功桑梓諸臣皆蒙

恩准於原籍建祠近年各省奏請亦均邀

俞允該故紳曾瑋次奉

旨幫辦團練協同官軍殺賊克城運籌決策保全桑梓厥功甚偉

臣與其患難知之較詳今據紳士聯名籲請未忍聽其湮沒合無仰懇

天恩俯准將已故布政使銜記名道潘曾瑋在原籍捐建專祠以彰盡績而順輿情出自逾格

隆施理合會同兩江督臣曾國荃附片具陳伏乞

聖鑒訓示施行謹奏

伍廷芳等仍請給獎片

光緒十二年九月初四日

再前因天津隨辦通商洋務委員又逾二年當將認真出力之候選道伍廷芳等九員照章奏請給獎聲明洋稅人員業經剔除奉旨著照所請欽遵在案旋經吏部覆稱部定嚴核保舉章程各關洋稅等項事務均屬應辦之件一概不准保獎前山海等關辦理洋稅請獎各案歷經奏駁此次請將伍廷芳等九員給獎仍應奏明更正等因臣查部定嚴核保舉章程內開各軍調遣之文員洋務差委之局員均先咨部立案不咨者不准入保外省釐金牙帖鹽局各關洋稅等項事務均屬應辦之件一概不准保獎等語是洋務差委局員仍准列保各關洋稅人員不准列保界限本自分明臣此次係將洋務出力人員照章請獎並先咨部立案其辦理洋稅人員已於原摺內聲明剔除實與部章相符今吏部將洋務

人員指爲洋稅亦不准其保獎似與定章兩歧況天津爲各口總
匯洋務本多棘手近來各國交涉日繁非他關之僅辦稅務者可
比該員等遇事勦籌任勞任怨歷時既久著有勤勞若尋常照章
獎敘靳而不予與僅辦稅務者無所區別殊不足以示鼓舞而昭
平允所有原保之候選道伍廷芳等九員實係洋務出力人員照
嚴核保舉章程應准列保並非稅務人員相應仰懇
天恩俯准敕部仍遵原奉

俞旨給獎註冊以符定章理合附片具陳伏乞

聖鑒訓示謹

奏

哈孫克賴乏請給寶星片

光緒十二年九月初四日

再德國副將哈孫克賴乏諳習魚雷事宜光緒八年向其海部商借來華飭赴威海魚雷營教習該洋員熟精魚雷祕要操練有法紀律嚴明並將一切口令編成中國語言俾弁兵易於明曉洵屬課導認真嗣因中法有事經德海部調令回國總理雷營現在旅順營廠規模皆其口授指畫弁兵得資循守實於海防軍政有裨自應量予獎勵查該洋員係德國武職大員向充魚雷總教習照總理衙門奏定章程應給二等第三寶星合無仰懇

天恩俯准將哈孫克賴乏

賞給二等第三寶星以昭激勸如蒙

俞允並請

敕由總理衙門頒發照會德國駐京公使巴蘭德轉行知照理合

附片具陳伏乞

聖鑒訓示謹

奏

奏調沈保靖片

光緒十二年九月二十六日

再北洋籌辦海防創練海軍及一切交涉事件頭緒繁多需才甚亟查有降調福建布政使沈保靖自同治元年隨臣上海軍營至十一年始行離營赴九江關道之任該員心地質直操履廉介辦事認真能任勞怨厯官江西福建均有政聲軍事洋務厯練亦久堪資指臂之助擬請

旨准將沈保靖留於北洋差遣可期得力理合附片具陳伏乞

聖鑒訓示謹

奏

奏留宋慶片

光緒十二年九月二十六日

再四川提督宋慶所統毅軍馬步各營分駐旅順金州等處操防向稱得力茲據該提督以從前積受暑溼遂成痼疾近復感觸海瘴又增氣虛下陷等症請轉奏

賞假兩月回籍調理等因

臣查宋慶忠勇夙著紀律嚴明出征多

年屢當大敵積勞致疾殊堪敬憫上年法越事定卽有回籍醫治之請經

臣

一再勉留今復以宿恙驟增乞暫還里惟旅順爲北洋

門戶拱衛近畿防務最關重要近雖海波無警而操練戒備不可一日或疏宋慶老於戎行所部又皆勁旅非得威信素孚之將未足以資督率應懇

天恩賞假兩月在營調理俾資坐鎮伏乞

聖鑒訓示謹附片具

奏

覆奏李成釐等獎案片

光緒十二年九月二十六日

再遵保派往朝鮮防護定亂出力人員請獎一案前已欽奉諭旨允准內有吏部議駁及行查各員復經臣查明附奏嗣准部咨除核准更正各員不計外將知府用安徽候補直隸州知州李成釐江蘇候補縣丞徐國楨吳子瑞陝西試用縣丞李應畹江蘇試用從九品吳朝彥候補國子監典簿吳景鴻山東補用知縣嚴道洪等七員按照奏定嚴核保舉章程既係各有省分未先咨部立案不准列保議駁又分省補用鹽大使紀堪麓分省補用鹽知事解茂承等二員按照鹽務官員應歸鹽務差委如因地方勞績不准請獎章程議駁知照前來臣查嚴核保舉章程係光緒九年六月奏定通行所稱各軍調遣之文員須先咨部係指原未在營者而言又有省分人員不准在他省列保係指已經到省者而言